

士治樂以作無為以度世中士治樂乃以和樂俗人以調治下士治樂裁以樂人以召食此三人者各論意太平氣至聽其所為從其具樂琴瑟慎無禁之則樂氣不出治難平難平則氣闕訟而多刑夫樂者致樂刑者致刑猶影響之驗不失銖分也凡樂者所以止怒也凡怒者所以止樂者也此兩者相伐是故樂則怒止怒則樂止是故怒者乃生刑罰闕之根也喜樂者乃道德之門也故當從之使生道德之根勿止之也止之反且生刑禍之門也此者吉凶之所出安危之所發也故樂者陽也刑罰者陰也陰之與陽乃更相反陽興則陰衰陰興則陽衰陽者君也陰者臣也君威則臣服民易治臣威則君治侮亂此天自然之法也故當從其君樂也以厭其民臣止其數怒也下古之人愚不深知其意反多斷絕之故使陰氣盛陽氣衰也陰氣盛則多盜賊罪人不絕凡萬物不生也多被陰害大畧在此樂氣興則陽氣盛以斷此害君氣盛則致延年益壽則上老壽夫緩與樂者上屬

天也急與怒刑者下屬地興行其上者萬事理興行其下者萬事亂真人戒之此言不可深思乎唯唯子可謂深知之矣傳之以示下古之人使各思其意慎無閉絕也樂則五方道德悉出怒則五方惡悉出也樂則天地道德悉出也怒則天地惡悉出也故天地樂者善應出也天地不樂者惡應出也故五方樂而和者五方善應出也故五方不樂而怒者五方惡應出也是非小事也故言毋斷絕也令凡人共惟思其意俱一覺悉出之然後悅樂氣至急怒氣去也善哉善哉行子已知之矣

右天上分別樂與怒所生吉凶訣

太平經卷之一百一十三

太平經卷之一百一十四

其訣第一百九十二

八六

前文原缺

行有疾苦心中惻然叩頭醫前補寫孝言承事恭敬以家所有貢進上之敬稱其人醫工見是心敬其人盡意為求真藥新好分部谷令可知迎醫解除常垂涕而言謝過於天自搏求哀叩頭於地不避瓦石泥塗之中輒得令父母平安教兒婦常在親前作肥甘脆恣口所食父母商家所有不致苦其子孫令盡家所有殊私心孝於前親屬比鄰見其孝善知無所有更往給餉為其呼迎醫工蒙薦席相與日夜數勞知其安危問養視其復聞小善言心為之喜歡是孝之所致也天見其孝心令得愈更如平素心中迺喜欣復身得能食穀者齋戒市賣進所有上於天還謝先人諸所得崇輒辛香潔不敢負言是孝子所宜行也俗聞知是善而不能行之能行之者性出自然天稟其命今使孝善子孫相傳治生有違不行侵人有益於親賓婚比鄰孝者還

報不忘其恩是之善者也父母之年不可豫知為作儲待減省小費歲歲有餘藏不見之處勿使長吏及小吏聞知因緣微發盡人財產為孝心未盡更無所有父母年盡無以餉送復為不竟孝之意行孝之人思成其功功著名太上聞帝廷州郡所舉一朝被禁是非孝所致耶子孫承之可竟無極之世此念恩不忘為天所善天遣善神常隨護是孝所致也其家一人當得長生度世後生敬之可無禍患各以壽終無中天者是不善邪善之中所致何所不成何所不就何所不得何所不通乎努力行之勿以為懈倦也是善人之福也孝善之人人亦不侵之也侵孝善人天為治之刺於目前是為可知欲知善之為善也知孝之為孝也若不能相效也是出自自然天與善籍善孝自相得傳相勝舉亦何有極心善孝之人人自從崇之亦不犯剋人流聞八達州郡縣長吏有空缺相補豫知善孝之家縣中薦舉長吏以人情欲聞其孝善道吏勞來又有用心者以身往來候之知聞行意薦

之歲歲被榮高德佩帶子孫相承名為傳孝之家無惡人也不但自孝於家并及內外為吏皆孝於君蓋其忠誠常在高職孝於朝廷郡縣出奇偽之物自以家財市之取善不煩於民無所投郡縣皆慈孝五穀為豐熟無中天之民天為其調和風雨使時節是天上孝善之人使不違災害人民師化皆食養有順之心天不違意也是善尤善孝忠尤孝遂成之使天下不孝之人相效為設孝意有大命赦天下諸所不當犯者盡除并與孝悌力田之子賜其絲帛酒肉長吏致敬明其孝行使人見之傍人見之是有心者可進愛有善意相愛此皆天下恩分使民順從此本善致善本孝致孝本不孝其末不孝本惡其末惡善者其願皆令其壽白首乃終上至百二十下百餘歲善孝所致非但空言而語也不但天愛之也四時五行日月星辰皆善之更照之使不違邪也其善乃如是不重邪天生人民必能善孝者身為之獨壽考復得尊官皆行孝所致不但祐言故出此書以示生民其

欲法則者天復令壽可傳子孫相保書出必當行孝度世孝者其次復望官爵天下之事者為上第一人所不及積功累行前後相承無所有失名復生之人得承父母之恩復見孝順之文天定其錄籍使在不死之中是孝之家也亦復得增度上天行天上之事復書忠孝諸所敬為天領職榮寵日見天上名之為孝善神人皆為神所敬有求美之食先上遺其孝行如是無有雙入其壽無極精光日增上見無極之天下見無極之地傍行見無極之境復知未然之事諸神皆隨其教令不逆其意共薦舉白太上之君見其孝行無單著其親近內外神益敬重之故言天所愛者諸神敬之天所憎者諸神危之是為可知餘者各自用意自擇其便從其所宜書辭小息且念其後得善復出不令遺脫

九君太上親訣第一百九十三

惟太上之君有法度開明洞照可知無所不通豫知未然之事神靈未言豫知所指神見豫知不敢欺枉了然何所復道太上之言何

有不動乎人同敬畏心不惑行是且得知不照其意所以然者太上皆神所生所化當生當活皆可神錄相次道其尊卑何有不從者乎九皇之上則九君九君者則太上之親也各有所行恩貸布施諸神從者諸神敬其所為靡有不就者也小神食不能知九皇之意何言俗間之人乎心聖耳聰財可觀其文章祿策當直錄籍文辭自生精光皆以金為簡銀成其文章此簿在天君內中極有副其餘曹文書辭皆以泰簡自生文章精神隨字名之光明每有語言輒照有所知不逆所言。神人真人得天君辭便具言神人上下皆知民間天君知神所言不失文墨規矩之中自然之道何所不知何所不化動錯自無所私飲食天廚衣服精華欲復何求太上之君所行也大神小神自有所行皆相畏敬不敢有私恣意見所從求動搖有心之心知其所為可成以不惑迷其意使其人各隨至意書汝皆受於仙錄壽得無極金銀紫文之繳封侯食邑復賜緣帛金銀珠玉心想所得是非

神仙道知人堅與不或賜與美人玉女之象為其作色便利之志意不傾復令大小之象見其形變意相隨念其後生此為不成之道或作深山大谷中多禽獸虎狼之處深水使化人心或有蟲毒之物使其人殺之或恐不敢上高山入大谷深水之中亦道不成是象戒人是在不上之中殊能堅心專意見迷惑不轉志堅隨其入出上下深山大谷之中水深大心不恐懼見其好色志不貪慕家人大小之象更相拘留不隨其人言但得生道進見太上盡忠孝之心無所顧於下是為可成戒大衆多取其要文天亦信善人使神仙慶之也其人自善天何從欺之所以有欺者其人狐疑彊索神仙無益之用無功而求安何從不見欺邪是天重生愛其情尤志堅念生要三明三明者心也主正明堂通日月之光名三明成道心志自不願亦有錄策不可強求白日昇天之人自有其真性自善心自有明動搖戒意不願邪財利之屬不視顧衣服麤粗衣纒蔽形是昇天之人行也天善其善

也乃令善神隨護使不中邪天神愛之遂成其功是身行所致其人自不貪世俗大管財物天知其至意按次簿名真自有善星其生日時自不為惡天復善之食化以助天君治理天上文辭使通徹行無私隱見行有歲數上竟榮簿有生名可太上之意能說其功行助其不及是亦神當所擁護也天信孝有善誠行無玷缺故使白日輒有承迎前後昭昭衆民所見是成其功使人見善白日之人百萬之人未有一人得者也能得之者天大神所保信也餘者不得比尸解之人百萬之人乃出一人耳功有大小更相薦舉其人當使天愛重之內為得太上腹心薦舉其為有信效各成其功名是不善邪天君出教之日神不枉其言是天君得善信效深知未然不可有毛髮之欺皆令壽命盡少盡小解於後復念語未卒意者復念道之

不孝不可久生誠第一百九十四

惟古今世間皆多不副人意苟欲自可不忠任事所言所道樂無奇異見人為善含笑而

言何益於事輕言易口父子相欺當日無聲背去隨後而言或善或惡不可法則無益世間世間但為塵垢言談自動無應善書者心言我善行不相副無有循教語言浮沈不可信驗名為不慎之人何可久前不可與善心

有志之人等乎求生難死之人不欲見是惡人而不自知以為我健少能相勝者及晨夜候取無義之財而不攻苦得之以為可久在中和之中與人語言也傍人見之非尤其言神靈聞知亦占其所為動作其心知其惡不能久善還語天神言中和有輕口易語之人不能久善須臾之間惡言復見無有信效但佞偽相責何益於人令食諸穀衣繒布隨冬夏易衣服食欲快口衣欲快身市有利入不肯求之而可養老親明且下牀未知所之術賣所有更為主賓酒家箕踞調戲談笑歌舞作聲自以為健交頭耳語講說是非財物各盡更無以自給相結為非遂為惡人不可拘絆自棄惡中何有善半日之間邪無益家用愁毒父母兄弟婦兒輒當憂之無有解已攻

取劫盜既無休止自以長年復見白首不知天運候神居其左右入其身內促其所為令使凶當斷其年不可令久其揚聲為惡不欲止上至縣官捕得正法不得久生與死為比安得復生或為鬼神所害父母念之常見其獨狹孤相守無有輔佐之者老更棄捐飲食大惡布得肥美衣履空穿無有補者是惡之極歲月年長空虛日久面目醜惡不象人色如是為子乃使父母老無所依親屬不肯有之此惡人之行賊乃上親屬患之名為蔽子死不見葬無有衣木便見埋矣狐狸所食骨棄曠野何時當復見故衣食時乎是為可知善惡之行人自致之何所怨於乎天下之人何其甚愚不計其死生之間殊絕矣生為有生氣見天地日月星宿之明亡死者當復知有天明時乎窈冥之中何有明時愚人不深計使子孫得欲禍不可救決流後生是誰之過乎人不化自致亡失年不當善仙士之行邪動作言談輒有綱紀有益父母使得十肥本或復好面目生光是子孝行力非惡人亦

獨不當報父母哺乳之恩邪為子不孝汝生子當孝邪汝善得善惡得惡如鏡之照人為不知汝之情邪故有善惡之文同其文墨壽與不壽相去何若生人久視有歲數命盡乃終後為鬼尚不見治問惡人早死地下掠治責其所不當為苦其苦處不見樂時是為鬼何以獨不有赦時是惡之極為鬼復惡何所依止家無食者乞丐為事速通亡之氣自不可久地下亦欲得善鬼不用惡也如是宜各念善不失其度纜可矣不者亦欲何望乎人當同其計策與生同願天不善之邪而反為惡乎惡行之人不可久視天地日月星辰故藏之地下不得善鬼同其樂得分別也文書前後復重者誠憎是惡人不可久生耳性善之人天所祐也子孫生輒以善日下無禁忌復宜月達日月星光明之時用是生者何憂不壽乎是為善行所致也善惡分別念中行者自從便安天不逆人所為也念之復念之思之復思之可前可却自不貪生者無可奈何也書辭可知分明疑之自令苦極念生

勿懈致慎所言辭復小止使念其後有不滿意乃復議之

見誠不觸惡訣第一百九十五

惟夫聖德之人各有所言各有所語各分別其能各自第其功各成其宜使有可信而重天言使天愛人而有感功得天之腹心是聖德之願也夫人皆欲承天欲得其意無有怨言故令各從其志勿有非言而自可是為富得人情使報信同其知慮而從所宜人居世間大不容易動輒當承所言皆不失其規中而不自責反怨言人言是為不平行之各有怨辭使天忿怒而不愛人言壽命無常故天下有聖心大和之人使語其意令知過之所由從來各令自改乃為人壽從中出不在他人故言司命近在曾心不離人遠司人是非有過輒退何有失時輒減人年命為知不相善之人欲聞其戒使待安靜過失之間使思其意令其受罰亡年不令有恨天大寬柔忍人不一朝而得刑罰也積過累之甚多乃下王者之曹收取其人魂神考問所為不與天

文相應復為欺欺後首過罪不可貸是故復勒下曉諭為說行惡災變所致使自改耳不用其言亦安可久久在民間為人手故分別善惡各使不怨耳天為設禁使不犯耳而故犯之戒命於天神可以久與人等也作行如此為使人不死之道乎中為天無所知邪俗人之行不可採取乃如是安可久置中和之中使食可食之乎而反善神所護年盡乃止無中天人時是善之證也為善日久何憂不盡年壽乎是為可知人自不能力為善而自害之是惡之人何獨劇自以為可久與同命不意天神使之使下入土入土之後何時復生出乎地下復相引浸益亡尸是復不得天福之人可復計邪行且各為身計勿益後生之患是為中善之人不者欲為惡人也天所不祐地不欲載致當慎之勿有愆負財得稱人耳可為父母子孫得續行恩有施可復得增年精華潤澤氣力康強是行善所致惡自衰落亦何所疑從今以來當詳消息善惡分別念中何行者自從便安天不逆人所為也

念之復念不順作逆而求久生是行當可久見於天神日月星辰安肯久照為天神所祐而爭欲危之是誰過乎不當是善行孝順之人邪輒有祿位食於司農久復子民使上下相事是民之尊者也是善所致惡自不全身相去幾何乎視其試書不用其言自快可意而行是為人非乎有惡不能自化有孝善有忠誠信之心而望天報有病求愈作惡過多無解時為可久貸與不故作此文欲使俗天之人各不怨其得罰耳念生求活之人自不為惡行而亡其年也得書見誠使知避禁不觸惡耳如是能自改為善可得久見天地日月星辰與人比等是不善邪而反不惜其命以為死可得復生如人知不自知為惡自以為可也談語欲與人比等衣食與部人同是為可久不乎畏死之人不敢犯此誠文是亦祿策所致其人相簿少可宜直命當宜之何所願乎行各自慎努力念所行安危之事書誠亦自可知也天書文欲使人為善不欲聞其惡也故自命簿不全耳無可大怪也詳復

思之勿懈也。天有生籍亦可會也。地有死籍亦甚可惡也。生死之間不可比也。為知不乎知惡當慎。自責不可須臾有亡其年壽甚可惜也。與人語言發聲為善行。得人心意是天善之無出惡言而自道。各同出口氣正等擇言出之。無一小不善之辭。可得延命。殊能思行天上之事。得天神要用其誠。動作使可思。可易命籍。轉在長壽之曹。宜復各修身正行。無忘天之所施。宜置心念報施大恩。乃為易行。改志天復。追念使不達惡。可信天書言。可得生治。不用書言。自不全釋其可行。乃行之不彊。所為各且念身善惡。天察其性。勿有所嫌疑也。宜不欺善而惡人得福也。是言者明白何有所疑乎。神仙之人皆不為惡者。各惜其命。是善之證也。書所言約勒前後道人。之所願為道善。惡使思之耳。不用而自已勿自然。自然怨者。但當知怨身。以知而窮老。乃極自然之耳。餘者自從其意。如欲貪生。不當有惡。故使自思。知其苦樂。樂獨何人。苦亦何人。亦宜自念。勿有怨辭。勿妄輕言。出氣令可思。

思生為善。故丁寧相語者。令語言可知。不失天規。矩行成自然之道。何所不成。何所不化。人皆迎之。是天自然之恩。非邪念下愚之人。不念受天大分。得為人。自以當常得久也。亦不意有巫靈之神者。當止勿犯非也。書辭非一念之復出。文辭有副。故置重誠。顧其不及用書念生為善。為有活望。復有惡言不順者。被疎記不息也。慎之且止。止復有所思。思後不足。不滿意者。復申理。

不可不祠訣第一百九十六

惟世俗之人。各不順孝。反叛為逆。競行為不忠。無信之行。而反無報施之義。自以成人。久在地上也。所說所道。未曾有小善。有惡之辭。而反常懷無恩。賦之施。自盜可意。而行不念。語後有患。苦哉。此子不是。在世間無宜。少信。彊愚。自以得人心意。其念出言。不可採取。難以為師。法無所畏。忌而功犯。非歷邪。自以可意。不計其命。不見久全。動作出入。不報其親。不復朝夕。夷狄相遇。此獨何人。從所出生。畧以其輩。飲食不用道理。未曾嘗當。亦無知。

之人比六畜。生死無期。口亦欲得美衣。欲得好天。當久活。汝不汝行。不可承用。亡亦其行。當可用。不使天忿怒。無有喜時。當愛汝。命令汝不死乎。所為皆觸犯。不當如故。為之是為自索。不欲見天地日月星宿。人民生口之屬耳。

天有誠書。具道善惡之事。不信其言。何從乎。欲得見。久視息。乎中為不如六畜。飛鳥走獸。有知邪是惡之劇。何可依玄。但作輕薄。街賣盡財。狂行首罰。無復道理。從歲至歲。不憂家。事。遊放。行戲。殊不知止。思不出。中自不可久。此人亦因父母。得生。其行反少。義不見。盡忠。孝。有順無逆之意。是天當置汝。使眼息不死也。死中有餘。過并及未生之子。念其作禍之人。雖以身行惡。而亡其年。使未生不見。有算。活。望。作鬼。復死不足。塞責。是惡所致。非乎。何得自在。而見活乎。昨使當出生者。怨是非。過邪。何為妄言。而久朗乎。天下之人。何不自責。而使過。少積過。何益於人。身乎。但有不全人。命耳。不當思之。邪何為。自益禍乎。是為可知。

也人居世間作孝善而得壽子孫相續復見  
尊官重祿是不作善為孝所致邪自無善而  
不願後有患此為大逆惡人更為無等比不  
休息乎父母生汝時欲聞其善寧欲聞惡聲  
聞者親耳邪兄弟相憎未曾有樂時各自責  
過負而反自用不為善是為不可久行無益  
於天無益於地無益於人無益於四時五行  
日月星之明其人甚惡欲何希望不當仰視  
邪以為天不違凶神司汝為非乎不當自怪  
所求所為既無可恃但日有衰病死不絕邪  
天亦何樂殺汝乎象曰汝無有通須臾之間  
故殺之或使遭縣官財產盡復續怨禍汝  
行之所致不乎何怨於天而呼怨乎俗人乃  
如是欲復犯天自理何益乎久通不祠祀神  
官所負不肯中謝所解所負解之常以春三  
月得除日解之三解可使文書省減神官亦  
不樂重責人也迫有文書上下相推何從民  
人之言貧困便止不竟所為乎生時皆食有  
形之物死當食其氣而反不食先人自言生  
子但為死亡之後既得食氣與比等而反不

相食生子如此安得汝久有子孫相親乎亦  
當亡其命與先去等饑餓當何得自在天官  
重孝順當祠明白何可所疑死後三年未葬  
之日當奉禱賽不可言地上有未葬者而不  
祠也不食益過欲子孫無傷時也是為可知  
當祠常苦富時奢侈死牛羊豬豕六畜祠官  
浸疎後當見責不顧有貧窮也財產不可卒  
得行復無狀財不肯歸便久不祠為責安可  
卒解乎宜當數謝通負之過後可有善子孫  
必復長命是天喜首過其家貧者能食穀知  
味悉相呼叩頭自搏仰謝天太原其貧苦祠  
官假之令小有可用祠乃責是為天所假願  
有自足之財當奉不疑也不奉復見先人對  
會祠官責之不祠意使鬼將護歸家病人  
不止先人復拘閉祠卜問不得得當用日為  
之天聽假期至不為不中謝天下地取召形  
骸入土魂神於天獄考更相推排死亡相次  
是過太重故下其文使知受天誅罰不怨可  
轉相告語可令不犯先古已有書犯者不絕  
以棺未藏者不可不祠也今故延出文因有

心之人書解其意勿疑書言尚可得生籍疑  
不行死日有期自消息勿復怨天各地也行  
書小息念其後思惟文言知當復所行復道  
之

天報信成神訣第一百九十七

惟有進善求生之人思樂報稱天意令壽自  
前日見天上可行之事曰亦奉行天之所化  
成使見久生之文變化形容成其精神光景  
日增無有解時是有心志善不忘天恩報施  
之士何時有怨解息須臾之間心自剋責幸  
得為人依迎天得成就復知天禁使其遠害  
趨善不違神靈見善從之未曾不自責時悔  
過從正思念其意常不敢自安自疑念之為  
善曉天知意具足可知亦無所疑自責悔過  
積有日數既蒙福祐承奉天化使不見危自  
知受天報施何可有忘須臾之間息恐神靈  
非充所言故懷悵然未曾自息貪進所言欲  
承天意恐有失脫故復洗心易行感動於上  
欲見昇進貪慕其生實畏短命之期恐久不  
見於天地竭力盡忠思其誠心數聞神言不

見其人心內不自安常齋惶懼日夜愁怖不敢自安用是之故不敢廢善而就惡施人皆得飲食仰天元氣使得喘息復知人情自知受天施恩輒當報謝何有疑時天生人精地養人形使得長大使得成就見天書戒視其文辭不戰自慄何有負言心常怖悸何有安時唯天大神時哀省原數見假貸心知不以時報大恩唯大神使見覆哀久見常在生氣之中久活前年之壽不敢忘大施之分恩貸畢足不敢解忘須臾之間而背恩也唯大神成之使見天神與其語言思聞復戒重天所言唯蒙有報乃敢自信大神報有善心人言天君常愛是有心善之人於天有用輒進自今有心善之人自陳前以達白天君承用所舉聽勿疑必當如前所言是自天君所敢前也歲月垂至努力信天所言天亦信有心善之人自不在俗間也簿文內記在白日昇天之中義不相欺天君欲得進善有心不違言是其人也諸大神自遙見其行雖家無之日前以有言宜勿憂之常念與天上諸神相對

是善所致也宜勿懈倦也有心善之人言生本無昇進入期心報大神永進貪生欲竭所知何敢望白日昇乎舉選當得其人生不敢當之恐見為大神所非蒙恩自僥倖得寵為得恩分畢足但惜未及重報施唯大恩假息蘇息之聞大神言前比白生意進之天君輒言有心善意是其人也天君自欲親近之不使有疑也恩施不在大神也何須道報乎宜復明所知必為有報信心謝懇惻而已必使諸神相護不令邪神干之也致重慎所言以善為該首書意有信相與要不負有心善進之人言也天自日夜使神將護之餘無所疑相命沮觸之書必先人承負自辭勿用為憂有心志善之人言本性畢微久在俗中恐不能自出俗世之間慕大神之恩寵遇使見溫誠自知唯大神白天君縱使在不死之任中為何敢望白日乎大神言天君信有心進善之人教無有二諾無所狐疑是自天君意也雖念家不足飢寒並至自有天廚但仰成事神自師化其子無以為念也生主受分之後

何時忘大神所言乎憂不成耳不敢失大神枕席常在心焉不敢解也大神言辭乃如天君知者善自得善有心自得天君心意前白事見天君天君勅大神言前日已白此人當升之日勿令失期竟有符在心前微視神自語為信變化以有日期但日夜念之勿懈也生言受勅之後何敢懈邪唯蒙成不大神言須書有符自相見也不憂不得天壽也不但大神邪諸神皆言善是有心之人諸神憂之但仰成辯而已生言是大重如使如願必親心恭而已大神言是亦其人願所當承心而言天君重其家使無入大過承負報解之勿信神象卜工之言是卜不能有所增減欲度活人者要在正神雖有小神之跡上自解之亦勿狂為不當所行也是自有心有道之人所知也且各為身計信天言天自不欺有心進善之人也雖知惠常念無有忘時聞邪神自下無有心志之人持身不謹復念非常故邪下之使不安或惡會無成功此書亦不信惡人惡人亦不信此書會有效用有報得



報信之後乃為可知也。今當有信知進善之人書神自欲見報信得用不信無有心進善之人欲所得也。行書辭已可知見信有驗亦自不久何以明之。其人自樂生者天使樂之是天報信其人必化成神必以白日不疑日自輕食日少為信精光日益親近其人。是信也明之明也且勿有疑生言見誠受勅請如所言思惟念之不敢懈有忘也。雖生素不知會見之後益親無異大神言善善亦當惠成名宜卒竟其功是神常誠也。書語雖多重生道故多耳勿怖之也。語且有止各還。有言有心志念之人言唯唯不敢有忘也。

有功天君勅進訣第一百九十八

惟思古今有大誠信之人各有效用積功於天乃敢自前動作止進未嘗有小差之惡常懷慈仁之施布恩有惠利於人衆不有失小信而不奉承天地隨四時五行之指歷助其生成不敢有不成之意而自危身令不安故自剋念過負恐不解除復為衆神所疏記而有薄文聞太上也。以是故敢有安時也。令古

相承善惡相流何有絕時乎。故自沈靜未嘗有懈而忘天之所施為也。但自念求德之人以心自悅見人有善心為之欣然見人有惡心為之惶懼想天神知之各有所進復自惟念本素生於俗間心常思樂大化貪慕生道去離死部戀牢精光貪使在身使自相愛心乃可安不者恐見不在常見之中唯諸天神時原不及教其進退當承天意不可有失而小不善聞於太上之君耳。故因諸神求知曠問唯蒙不逆使不見疑為受一子之分勢不敢有忘絲髮之間唯原省念所言思見天誠以成其身不使陷危是諸神寵恩之日不敢有休息而不自念報重之大恩也。諸神未白天君聞知被遣當直之神承教見之其人言所動搖云何具問其意使諸神問之還白曰言中和之民自道善行積功日久貪慕久生自薄說常自垂念恐有愆負未嘗有懈怠之意為諸神道其功勳諸神使白各且相謂曰此有功功德人自於中和中念當報天大恩積行為善日久欲因諸神自道功德各懷孤

疑不敢進白天君常屬諸神見信有功於天有者進之而諸神占觀其行日久何故不白諸神皆懷懼而言本素不知此人來恐不大精實且各消息其意不知天君聞之是諸神各無所主正見善有功之人而不時白道之使者遣使神考積其行大有功是諸神各為無狀各無有功善而齋外心以為天君不知諸神各解辭令自何用者有益而已各自安乎謝諸神各以識事免冠謝言小神奉職各平盡忠誠之心而得問是罪無狀待死於門。天君出教日且待於外須勅諸神伏地自以當直危立也。教日勅諸神言天君欲不惜諸神且未忍相中傷教諭於中和地上在京洛十年賣藥治病不得多受病者錢調竟上者著聞曹一歲有功乃復故諸神見天君貫不死之罪燒得薄謫誠自知過失自以摧折不望其生不忍有中傷之意復以事謝天君言告謝曹吏使下勿稽留時使神行卓視之曹白使遣下如天君教天君勅曹復告大神視其文辭令諸神見之曹以文傳視大神下所

部各順其職見有功善貪進之人當進之前有事具白可知天君勅大神曰觀早觀此人與使神語言相應與不也大神曰彼使徒視其人積其日數視功効還白日被勅教視中和有功人還白如使神言天君亦如是有功之人而諸神所部不時白天君覺知乃道其意是不勉邪哉得薄議於中和自今以後可以為誠有功不白天君聞之受罰自身之論各慎職道神導化其人使成神增其精光為視簿籍使上無者著其姓名上之大神受教還於曹視簿案其姓名有此白言曹文書有此人請案天君內簿知相應與不天君出文視之與外書同勅使上大神言不審年滿未請還諦案之天君謂大神安置耳目而不盡視之而言還案乎大神以職事謝天君言趣案疾還大神則案其人年已滿失脫不白無狀當坐伏須辜誅天君言且冠視職復勿懈因召其入上之勿失其效小職知所致奉功唯唯請如天君出教諾之大神且上其人署小職觀望其行日月尚淺請復情實有大效

信真有缺者署之補缺處天君言當知大神所白勿有懈意大神言唯唯請使使神往卓視之天君言善  
不用書言命不全訣第一百九十九  
惟天上有聖明之人皆有部職各盡忠行不負於上各盡筋力所為作亦不失意皆豫知天君所施為常傾耳聽欲知其意常視儲曹文部別令可知顧君呼召無時不敢私出公事乃行輒關意相白乃救出所周所徧被救當所案行不敢留止須臾之間奉功私乃敢有所言誠相歸自不敢施私所不當全其命不惜晨夜而自責常恐有無牢之用各自該理其身欲副太上之意何時敢懈恐失其宜效日自進不須神言乃而欲自成欲得久視與天上諸神從事無有大小皆相關知可承行不義不自專恐有嫌疑動輒相聞何有息時所以然者人各有志各自有所念各有所成其計不同各有所見各有所出生各自欲有所得各知其所心乃了然是曹之事要當重生生為第一餘者自計所為生氣著人身

皆不相去相守相成神亦貴得其名變化出入無孔之中小大自在俗夫之人不見神形容神神自相知形容皆氣所成何有不就者乎大神小神精光增減輒自有差其壽增九輒有其年大化行善壽亦無極上則無上下則無下出入無間無表無裏象如循環欲止自止欲行則行呼吸成神光景榮華上下有期得當行便以時還亦不可自在迫有尊卑各相為使各有簿領各有其職宜有其心持志不違明其所為各見其功各進所知無有所私動輒承教不失教言而精進趣志常有不息得勅乃止是生神之願輒有符傳以為信行諸所案行當所稟食勿過文書隨其多少天上傳舍自有簿領不當得止者勿止是天君常教勿妄恐守傳之吏以威勢也官有尊卑不可濫詐稱大位而稱久止傳舍吏輒受天君勅有過傳舍上其姓名官位所屬不得有隱欺天君亦自知之何得為相私明各如其平乃得上不用令勅簿書數上是復亡失精光其壽損減是為可知宜當慎時無敢

自從而不承上之教也。天上之神更相養舉亦無息時。後進上下人當知是禁聖明之人不犯之恐後進上之人不見其戒。故天下文使知防禁。是天君大恩。恐有犯者。是天君欲成就善心之故。視其文并語俗人。俗人雖以知中和之間。各有禁忌。文書天下中和民間道上。佃夫阡陌。聚社廬宅。官舍門戶。井竈刑德各主其事。不可有惡。復見疏記。薄其姓名積衆多。聖明理之事更明。堂天君得知。復藏人年上至死亡。可不慎乎。數下此文者。後生之人不信前言。故復因有知慮之人不犯禁者。出之令俗間知之。而不用書言。命不可得全也。惡籍累積日多。少有減時。故先命勅書。誠勿使相犯之命。薄不疑也。當順書言小過。尚可救解。大過安從得賞乎。誠文非一卷。宜當重慎。重慎天文不可自在也。有知之人。少有犯者。時有失脫。天亦原之。不著惡伍。為惡不止。與元籍相連。傳付土府藏。其形骸何時復出手。精魂拘閉。問生時所為辭語。不同復見。掠治魂神。苦極是誰之過乎。同從人

生何為作惡行。各宜善自守。天稟人壽不可再得。作惡年減。何有相益時乎。此時當所主天君取信。不敢脫人惡行。令得久生也。為不知乎。書前後相戒者。既民不改。令人欲盡年耳。不欲為善自令不全。亦奈此人為惡不止。可書辭小解。且念其後如有不備。乃復念之。

### 大壽誠第二百

惟有志之人心不迷。亂奉天之化。當所師導。各使從其願。乃為隨心。衆萬二十物皆生中和地中。滋生長大。皆還自覆。蓋陰其下。本根其花實以給身口。助其投糧。使有酸鹹醋淡。自在化水。為菹使調。諸味以豆為鼓。助鹽為味。濃厚自然。菜茹衆物。當入口者。皆令民食之用。其溫飽長大。形容子孫相承。復以六畜不任用者。使得食之肥美甘脆之屬。皆使食是天使奉職之神。調和平均。使各從其願。不奪其所安。是布施惠民。非乎奈何。天所施而不求報乎。天何時當求報。施乎。但平民受大恩而不歸相謝。故求之耳。天食精華氣自然。不必須民報謝。辦也。貴其意耳。而反不念

天氣所生成。令得食之。是民中有知不報。乃如是。自以職當天使奉職之人。案行民間。使飛蟲施令。促佃者趣稼。布穀日。日鳴之。使民用其言。家無大小。能食穀者。晨夜盡日。相勸及澤。布種天為長。大時雨風。搖枝葉。使動成其身。日滿當熟。以給人食。恩不重邪。從歲至歲。何有極時。而反齊不作。孝順有逆之心。何益於天。久養惡人。使見可食之物。乎中為天無所知。邪何為當。久養不孝惡逆之人。乎故置凶神隨之。不孝惡逆之人。移令人重禁罪。至禍重不見。賞時想民。當知是何為犯之。自致不壽。亡其年命。乎不當親孝善之人。獨得壽。有子孫乎。善惡當相比。不壽與不壽。為有比不生之。與死當相懸。不行作善。有孝慈使各竟其年。或得增命。子孫相次。無中天時。天用是為善孝之行。所致不當比之。邪何為作非邪。施於人乎。天甚憎惡之。輒使絕命。子孫得欲是惡。所致欲何所望。天喜善人。不用惡子。宜思書言。其文具足。可以自護。必得天福。可無久苦。自愁。今憂滿腹。復有憂氣。結不解。

日夜愁毒大息念在錢財散亡恐不得久保  
 疾病連年不離枕席醫所不愈結氣不解計  
 念之日夜羸劣飯食復少不能消盡穀五藏  
 不安脾為不磨是正在不全之部短氣飯食  
 不下家室視之名為難活有錢財家頗有儲  
 侍無錢財產殫盡內外盡貧不能相發死命  
 以至不見棺木畢埋土中須治生有錢財乃  
 當出之相貧之家財去人走何時可合家室  
 分離不能復相救遂不見棺木為無棺槨之  
 鬼浮遊無家亦無復食之者死為鬼餓乞求  
 食無有止時是惡行所致而不自知亡失宗  
 族嗚呼痛哉死無所依是過積禍之人自致  
 無門戶後世天甚復傷之故使復有遺腹子  
 未知男女兒生未大母去行嫁至年長大問  
 其疎親我父母何在親言汝父少小父母不  
 能拘止輕薄相隨不顧於家劫人逼盜殊不  
 而自休止縣官誅殺遊於他所財產殫盡不  
 而來還故鄉久在異郡不害所至死生不可  
 得知也諸家患毒親屬中外皆遠去矣汝母  
 懷妊時見汝生有續心中復喜家長大人無

所依止貧無自給使行事人隨夫行客未有  
 還期遺腹子言人皆父母依仰之生我獨生  
 不見父母至年頗大問父所在人言汝父行  
 惡遠棄父母遊蕩他方死生不知所在無有  
 往來者聞言已死不知所在父母憂之發病  
 不起遂不成人財產殫盡內外盡衰谷在  
 餘親希疎素無恩分不直仰天悲哭淚下沾  
 衣父有惡行自致不還於處身自過責無有  
 解已時以行客賃作富家為其奴使一歲數  
 千衣出其中餘少可視積十餘歲可得自用  
 還故鄉招藏我父晨夜啼吟更無依止甚哉  
 痛乎父時為惡使子無所依止淚下如行自  
 無乾時天大哀傷常使強健治生有利使取  
 妻婦復有子孫心乃小安耳復為其子說之  
 我父行惡遠在他鄉不還時往人去者卜工  
 問之殊死生不知所安所在招藏之有歲數  
 去行治生天哀窮人使有利入頗有少錢因  
 求婦相助治生因有汝耳我疾我父少小時  
 為惡故誠汝耳從今以後但當善耳勿效我  
 父遠之他事故復思我過天哀我耳汝努力

心為善勿行遊蕩治生有次勿取人財才可  
 足活耳各且相事無妄飲酒講議是非復見  
 失詳思父母言可無所怨天上聞知更為善  
 子可得久生竟年之壽為汝作大以是為誠  
 諸神聞知上白於天天令善神隨之治生有  
 進財復將增生子遂健更為有足是天恩也  
 春秋節臘輒奉天報恩既不解努力為善自  
 得其福行慎所言復自消息天神常在人邊  
 不可在言慎之小差不慎亡身見誠當責身  
 勿尤他人也此戒可知也欲得大壽者勿失  
 此戒言

病歸天有費訣第二百一  
 惟人居世之間各有所宜各有所成各不奪  
 其願隨其所便安自在所喜商賈佃作或欲  
 為吏及所醫巫工師各令得成道皆有成以  
 給民可用是天師化何有不就使自給口當  
 念奉天所行息分之施四時之報皆使不絕  
 香潔而已是為報天之恩行善日久神靈所  
 愛是善行所致何有不從者乎故天常為其  
 上司人是非使神往來知人所為善惡輒白

何有失者知知少以為不然故天為視其影  
響使聞音以是為效風雨暹疾皆使可知何  
有疑者動作輒異文墨相承亦不失其法人  
亦當知可不安得自恣而不顧天乎天親愛  
元氣自然從其教令不敢小有違之意恐其  
有失而民所為功犯天法不避羅網是為故  
天命以自誠為當久生可與善人等也中為  
人得自在邪故使神隨惡行人之後司其不  
當所為輒以事白過無大小上聞於天是自  
人過何所怨天書書有戒而不用其行得病  
乃惶豈可免焉誠民之愚何益於天使神勞  
心煩苦醫巫解除欲得求生不忘為過時當  
為若時乃知是何不即自悔責己病乃求生  
已後之多亡所有禱祭神靈輕者得解重者  
不貫而反多徵召呼作詐病之神為叩頭自  
搏欲求其生文辭數通定其死名安得復脫  
醫巫神家但欲得人錢為言可愈多徵肥美  
及以酒脯呼召大神從其寄精神致當脫改  
死名籍不自致錢財殫盡乃亡其命神家求  
請滿三不下病不得愈何為復請事禍必更

有禍責在其後邪神稱正神狂行斬殺不得  
其人而殺之怨怒訟上至天天君為理之殺  
事神之家子孫坐為病者求福欲令為求生  
呼召不順反受其殃事邪神之家自言我神  
正神者教其語邪神精物何時敢至天君之  
前而求請人乎但費人酒脯棗餼之屬得病  
反妄邪神之家得愈者謂在不死之伍中事  
未上過可得蒙愈此天自愈之邪神之家何  
得名之而言多愈人病乎而責人肥美見邪  
神所為則召令上之考問藏罪藏多罪大便  
見不活事神者神不往來人復不中精神日  
竭是邪神自其殃神家得邪神餘物以給家  
口肥美好衣自以可久神當坐之何望得活  
而壽乎受神藏多不可獲貫并亡其子孫反  
言其過殺我子孫或身亦望久久亡戶人日  
當自正可勿怨天今世之人行甚愚淺得病  
且死不自歸於天首過自搏叩頭家無大小  
相助求哀積有日數天復原之假其日月使  
得蘇息後復犯之叩頭無益是為可知努力  
為善無入禁中可得生活竟年之壽不欲為

善自索不壽自欲為鬼不貪其生無可奈何  
也行慎所言辭樂知餘者自計勿枉所為有  
病自歸於天可省資費無為大煩反舉家征  
松避舍遠處當死之人遠何益凶神隨之當  
可得脫不乎愚人為行乃如是寧能使命在  
不死之中可勿避也舍不殺人家自哀耳天  
神在上占之欲何所至乎中為不知汝處邪  
且慎所言天致愛人欲使人生何時欲害殺  
人故施禁法使人不犯之耳而自犯之壽命  
從何得前當思之思之復念書言可無自疑  
書復小止後念之當所道說者復道之  
不承天書言病當解誦誦第二十二  
惟念俗間之人甚獨愚處不念作孝順事而  
為反逆不承大書言而苟自薄與人既無善  
而惡數聞處者致災中者衰落下者見病無  
有休息是為惡施於人令各不容無有施恩  
之意日夜行侵剋善人令使自怨無有善意  
相待而反自策陷人入罪名使得有刑罰高  
至死亡而決其主有財之家能自解酒無錢  
觸法教吏呼召亡費解之齋家所有皆有價

數乃為解之分半自得以給家口美酒善服  
 恣其所得於意乃可不知人當從傍平之所  
 為惡也自以可久而與人等縣君嚴者使人  
 司候效功之吏當有報應晨夜司之欲得其  
 為惡主黜跡等輩為誰逕至門閭內刺合牒  
 道其姓名為吏受邪簿主為閭人道其短長  
 酒肉甘肥常不離目下君得牒書默召其主  
 為置證左使不得詆罪定送獄掠治首賊人  
 復言之并加其罪閭亦然錢財小故不自努  
 力周達治生有利而反賣舌於人相陷罪名  
 是正惡何復久生長吏所疾令不得生是誰  
 之過乎皆從惡弊人出父母愁毒宗家魚毒  
 為行如此亦何所望而欲得久視息哉主作  
 禍罰而望求生此為何人天從上視之言不  
 可久忍下文於主凶惡之曹遣吏從惡鬼佐  
 助縣官治無狀之人使入死法不得有生之  
 望是皆貪非一家之財以自增益而坐之得  
 罪定死乃休無續世之人乃使先去者不見  
 享食是汝過非從今以往後生之人見誠當  
 止乃小活耳不者定在死任之中不疑也慎

之小差可無相怨人命不可再得人皆如是  
 何為不從禁乎無狀之人結客合伍劫取人  
 財其主不全縣官未得殺汝天代誅罰上自  
 滅戶下流子孫用是財故而反不生是計何  
 一不統故數出此書文者貴此不犯耳今續  
 犯之尤處故令死亡者多天甚愚之故見其  
 人有心知者自不犯之今世俗人了不可曉  
 視其壽書而不用其言以為書不可信用也  
 不當見神仙之人皆以孝善乃得仙耳其壽  
 何極且詳所言同出辭言可令好所為出惡  
 自令得各書前後之戒者但欲使人為善不  
 犯法耳何時相枉乎宜往念恩著於五內令  
 可奉行勿非尤於天也非之無益更相令過  
 重慎勿有所恨行自得之何怨怒努力從善  
 乃可為人耳行當自惜無為鬼所怨為知不  
 乎宜各自明其計勿自遂非沒命不足塞責  
 殃禍所歸者多怨憎何有止時持心不密但  
 空言無益世間之用慈毒於人復何用相明  
 使有和順乎自以為賢以化他人為不肖不  
 當自況俱生為人無所照見問之無有相明

之意是曹之人皆如六畜但口知臭香衣好  
 禮跪起不可法則常有不錄之心見比鄰老  
 人犯俗不起閉人婦女議相刑別其醜好此  
 為惡人無所事作端仰成事口罵呪詛以地  
 無神更相舉自可而行不念後患將至不  
 及相救救之已晚何益於事但為煩苛終可  
 見理何以自明解其所負眾多人所非作禍  
 不止久至亡家後無子孫不見其壽寬哉此  
 行亦何可久太平之書令下可順其上可得  
 長久不者失命復見難治令世俗人亦自薄  
 恩復以義理當前可意各不惜其壽縱橫自  
 在以為無神隨疏之者眾多事事相關及吏  
 明堂拘按前後上其姓名主者任錄如過員  
 輒白司官司官白於太陰太陰之吏取召家  
 先去人考掠治之令歸家言呪詛通負被過  
 行作無有休止故遣病人病人之家當為解  
 陰解謫使得不作謫解得除之不解其謫病  
 者不止復責作之既不解已以為不然觀其  
 所行皆有其人多與少耳是為可知復慎其  
 後勿益其怨乃為有知可使無怨無知自己

惡福之間未曾休止各慎書言不須相負難為記蹟神不休止想人知人而故為耳是不善故之也固善得善惡自不壽何為有恨自得之耳下順其上可無惡子為知不乎戒之戒之可令小息書難為文辭法令開張宜不犯耳書復小解復有小不定文者詳念其後但令可知慎之慎之小事致大文復重故小息耳息後有言復陳說之

為父母不易訣第二百三

惟有善行之人自不犯天地四時五行日月星辰諸神之禁畏其所施恐犯之輒有上姓名以故自欲為善行孝順之義天地禁書故不欲令民犯之者欲令民充盛何時欲令藏手設施當生之物使得食之何時欲使相危乎人自犯耳故善人無惡言者各有其文所識所成分明可知善自得生惡自早死與民何爭故置善人文以示生民各知壽命吉凶所起為道其誠使不犯耳行善之人無惡文辭天見善使神隨之移其命籍著長壽之曹神運成其功使後生之人常以善日直天王

相下無忌諱先人餘葬井之大壽百二十其子孫而承後得善意無有小惡亦復得壽白髮相次子子孫孫家足人備亦無侵者佃作商賈皆有列入為吏數連無刑罰之意善所叔也人不能做效反僂笑之是善人之心行自善有益於人見人窮厄假貸與之不資費息人得其恩必不負之小有先償酒肉相謝兩相得恩天見其行復善之使其出入無干犯之者行善之人天自佐之不令違惡是行所致其餘為不善之人欲望坐得壽復有子孫是為不分別故天別其壽殊能行天上之事與天同心志合可得仙度錄上賢聖精神增加其壽何極故言善不可不為亦人所不及故天重有善人愛之不欲使有惡也善惡之人各有分部何得二千乎故天書辭具自可知也善者善之惡者戒之欲使不陷於危亡之夫其年耳是天報善增其命惡者使下不成人是亦可知也何為有疑乎人從生至老自致有子孫各令長大成就在所喜隨使安之無逆其意各得其宜乃為各從其願為

人父母亦不容易子亦當孝承父母之教乃善人骨肉肢節各保全完父母所生當令完勿有刑傷父母所生非敢還言有美舉進家財物賅恭溫柔而已數問消息知其安危是善之善也鄰里近親盡愛象之成善之行見有凶惡之人不敢與語言恐相反也相反之後更失善人惡天復憎之故皆自重惜損其子孫慎無犯禁使家不安不但不安也并及家親內外肅動更逢縣官亡滅財產故令自慎不違書言能親安和邕邕無有二言各自有業各成其功是大善之人行天必令壽神鬼祐之不敢失四時所奉進各有差序市價取好不爭價直所以然者夫有所奉進皆有精神隨上下進退小異不潔輒有文墨不有失故順所費所道乃為恭敬神靈必喜上白司命祠官各部吏安行或自行見其潔香乃享食食後大曾五祖乃於處食必歡喜家遂富有子孫皆善無有惡子郡縣聞之取召使為有職之吏輒轉入府府有要顯職州復聞知辟召親近舉康茂才是善所致也

行自得之其位必至是亦相稟稟命所得明其為善之徵惡不過其門天上諸神皆言是行尤善但未知天意耳故使善文善人記其竹帛使後生令得食進遂善家世世有榮子孫不難朝堂帝王愛之常在善職是功自然皆其福所致也故有善者當法此書言取信驗不空言也

石天上說孝以止逆亂却夷狄令下順從易治

太平經卷之一百一十四

太平經卷之一百一十六原缺一頁

某訣第二百四

前文原缺

合其氣與帝王用事同喜同心同指同方同運同樞同根同意故古者聖人陳法使帝王春東方夏南方秋西方冬北方者主與此天氣共事也氣同故相迎也是主所謂謹順天之道與天同氣故相承順而相樂主所言和同者相樂也相樂者則天地長喜悅不戰怒不戰怒則災害姦邪凶惡之屬悉絕去矣惡人絕去乃致平氣天上平氣得下治地下平氣得上升助之也如不願樂用皇天后土所願用氣而休廢氣也皆應錯逆天地之道逆帝王之氣與天地用意異天地戰怒萬變並起姦邪日興則致不安平凶年氣來故當深知之也善哉善哉愚生聞命矣易曉乎天喜之真人慎之唯唯謹詳記不敢忘善哉善哉天明師既加不得已願聞其春夏秋冬云何哉皆順其氣如其數獨六月者以夏至之日并動宮音盡五月六月者純宮音也又樂

者乃舉聲歌舞夫王氣者宜動搖動搖見樂相奉順見奉助也休囚死氣皆欲安靜不欲見動搖即不悅喜則戰怒戰怒則生凶惡姦邪災害矣是乃自然天地之格性萬不失一也當動搖何氣乎願聞之以為法不敢進一氣是常先動其帝氣其次動王氣其次動相氣其次動候氣其次動微氣此氣皆在天斗前日進欲見助與故動之其餘氣者皆在天斗後天氣所背去氣日衰故不宜與動與天反地逆不合天地之心故凶故天之所向者興之天之所背者廢之是為知時氣吉凶安危可知矣請問今純動王音五音不足不成歌舞之曲如何乎善哉子之言也然但先動故為陰陽者動則有音聲故樂動輒與音聲俱陽者有音故一宮三徵五羽七商九角而二四六八不名音也刑者太陰者無音而作故少以陰害人無音而作此之謂也今軍師何故有音哉善乎子言也然君子有軍師有音但倡樂却之耳不必欲害之也及惡發且害之時非有音聲起中而已不復相告語也